



PRAVILNIK

o načinu provjere potpisa podrške i obrasci za ovjeru političkih subjekata za učešće na
neposrednim izborima u Bosni i Hercegovini

(Prečišćeni tekst)

Sarajevo, maj 2016. godine

Na osnovu člana 2.9 stav (1) tačka 2., a u vezi s Poglavljem 4. Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 07/14 i 31/16), Centralna izborna komisija Bosne i Hercegovine je, na 22. sjednici, održanoj 05.05.2016. godine, utvrdila

P R A V I L N I K

o načinu provjere potpisa podrške i obrasci za ovjeru političkih subjekata za učešće na neposrednim izborima u Bosni i Hercegovini (Prečišćeni tekst)

Član 1. (Primjena)

Ovim pravilnikom utvrđuju se: način provjere potpisa podrške, raspored i broj kandidata na kandidatskim listama, te izgled i sadržaj obrazaca za prijavu, ovjeru i kandidovanje za učešće na neposrednim izborima u Bosni i Hercegovini.

Član 2. (Način provjere potpisa podrške)

(1) Provjera potpisa podrške iz člana 4.4 stav (5) Izbornog zakona BiH vrši se metodom statističkog uzorka. Veličina statističkog uzorka iznosi 10 % potpisa podrške od ukupnog broja podnesenih potpisa podrške.

(2) Politička stranka ili nezavisni kandidat za koje se utvrdi da su uz prijavu podnijeli manji broj potpisa podrške od zahtijevanog broja potpisa propisanih članom 4.4 stav (5) Izbornog zakona BiH neće ispuniti uslov za ovjeru, odnosno provjera potpisa podrške će biti izvršena samo za one organe za koje je podnesen dovoljan broj potpisa podrške.

(3) Za političke stranke i nezavisne kandidate koji ispunjavaju uslov iz stava (2) ovog člana označit će se određeni uzorak potpisa podrške koji će se provjeravati, vodeći računa da uzorak bude ravnomjerno raspoređen među potpisima podrške, a zatim će se formirati baza podataka za provjeru koja će sadržavati: naziv političke stranke ili nezavisnog kandidata, ime i prezime potpisnika i jedinstveni matični broj potpisnika.

(4) Prvo će biti utvrđeno da li je neki birač dao svoj potpis podrške za dvije ili više političkih stranaka ili nezavisnih kandidata. Ako budu utvrđeni takvi slučajevi, potpis će se smatrati nevažećim za sve političke stranke ili nezavisne kandidate kojima je dat.

(5) Potpisi podrške provjeravat će se u Centralnom biračkom spisku kako bi se utvrdilo da li je potpisnik podrške upisan u Centralni birački spisak. Provjera će se vršiti na osnovu jedinstvenog matičnog broja potpisnika. Ako se utvrdi da potpis podrške nije dalo lice koje je upisano u Centralni birački spisak kao birač ili potpis podrške nije u skladu sa odredbom člana 5.13 stav (2) Izbornog zakona BiH, potpis će se smatrati nevažećim.

(6) Nakon provjere i dobivenog procenta validnih potpisa na statističkom uzorku, oni će se primijeniti na ukupan broj podnesenih potpisa podrške.

(7) Ako je broj prihvaćenih originalnih potpisa jednak ili veći od broja originalnih potpisa podrške koji se zahtijeva prema odredbi člana 4.4 stav (5) Izbornog zakona BiH, Centralna izborna komisija BiH prihvatit će potpise podrške političke stranke ili nezavisnog kandidata.

(8) Ako je broj prihvaćenih originalnih potpisa podrške na osnovu unesenog statističkog uzorka manji od broja potpisa podrške koji se zahtijeva prema odredbi člana 4.4 stav (5) Izbornog zakona BiH, Centralna izborna komisija BiH će unijeti sve dostavljene potpise podrške, te izvršiti provjeru validnosti svih podnesenih potpisa podrške.

(9) Ukoliko se i nakon postupka utvrđenog u stavu (8) ovog člana utvrdi da politička stranka ili nezavisni kandidat nema dovoljan broj potpisa podrške utvrđen u članu 4.4 stav (5) Izbornog zakona BiH, politička stranka ili nezavisni kandidat dužan je u roku od dva dana od dana prijema obavještenja Centralne izborne komisije BiH otkloniti nepravilnost.

(10) Politička stranka ili nezavisni kandidat koji ne dopuni broj nedostajućih potpisa podrške u roku navedenom u stavu (9) ovog člana ili dopunjeni broj potpisa podrške nakon provjere bude manji od utvrđenog broja propisanog članom 4.4 stav (5) Izbornog zakona BiH, neće biti ovjereni za učešće na izborima, odnosno mogu biti ovjereni za organ za koji je podnesen dovoljan broj validnih potpisa podrške.

(11) Za izbor predstavnika za popunu garantovanih mandata za pripadnike nacionalnih manjina nepodnose se potpisi podrške birača upisanih u Centralni birački spisak.

Član 3. (Prilozi)

(1) Sastavni dio ovog pravilnika je:

- a) obrazac prijave za ovjeru političkih subjekata;
- b) obrazac za prikupljanje potpisa podrške;
- c) obrasci kandidatske liste i
- d) tabela zastupljenosti spolova - instrukcija o raspodjeli kandidata manje zastupljenog spola na kandidatskim listama.

(2) Obrasci prijave za ovjeru i za prikupljanje potpisa podrške iz stava (1) tačka a), b) i c) ovog člana bit će dostupni u Centralnoj izbornoj komisiji BiH od dana kada Centralna izborna komisija BiH objavi održavanje izbora do dana koji je određen kao posljednji rok do kojeg politički subjekti mogu podnijeti prijavu za ovjeru Centralnoj izbornoj komisiji BiH.

(3) Obrasci iz stava (1) ovog člana štampat će se na jezicima i pismima koji su u službenoj upotrebi u Bosni i Hercegovini. Politički subjekti su dužni podnijeti zahtjev koji će sadržavati podatke o jezicima, pismu i količini obrazaca, na kojima žele da im se predaju obrasci iz stava (1) ovog člana.

(4) O svim izdatim obrascima iz stava (1) ovog člana vodi se evidencija u Centralnoj izbornoj komisiji BiH.

(5) Prilikom podnošenja prijave političkih subjekata, sačinjava se zapisnik, te se smatra da je politički subjekt upoznat sa eventualnim nedostacima u prijavi.

Član 4.
(Propisi obuhvaćeni ovim pravilnikom)

Ovaj pravilnik obuhvata Pravilnik o načinu provjere potpisa podrške i obrasci za ovjeru političkih subjekata za učešće na neposrednim izborima u Bosni i Hercegovini („Službeni glasnik BiH“, broj 37/14) i Pravilnik o izmjenama Pravilnika o načinu provjere potpisa podrške i obrasci za ovjeru političkih subjekata za učešće na neposrednim izborima u Bosni i Hercegovini broj: 05-1-02-2-520-1/16 od 05.05.2016. godine.

Član 5.
(Objava u službenim glasilima)

Ovaj pravilnik bit će objavljen u “Službenom glasniku BiH”, “Službenim novinama Federacije BiH”, “Službenom glasniku RS”, “Službenom glasniku Brčko distrikta BiH” i web stranici Centralne izborne komisije BiH www.izbori.ba.

Broj: 05-1-02-2-520-2/16
Sarajevo, 05.05.2016.godine

